

CITIZEN

LIESERINNEBREIF

En Owend am Tempel zu Luxorr

Sandra Schmit


Den Donneschde vun der virrechter Woch war eng Konferenz iwwert d'Autorerechter an der Chambre des Métiers. Déi Veranstaltung huet d'Autorin vun dësem Bréif duebel interesséiert, well souwuel als Schrëftstellerin wéi och als Literaturwëssenschaftlerin ass et gutt ze wëssen, wéi de Copyright zu Lëtzebuerg am Detail geregelt ass.

Dat Ganzt war organiséiert vu Luxinnovation, a geschwat hunn zwee Vertrieber vun der Autorechtersgesellschaften Luxorr. Ech war e bësschen erstaunt iwwert de Publique: ausser mir war just eng Schrëftstellerin am Sall, déi ech kannt hunn, an och vun den Editoren hat sech kee gewisen. Och d'Bibliothèque war weening vertrueden. Stattdesouze vill gewichteg Häre do, vun denen ech mech gefrot hunn, wat hiere Besuch zur Konscht wier. Dat sollt ech am Laf vum Owend nach gewuer ginn.

Als éischt huet de President vu Luxorr, de Jean-Luc Putz, d'Wuert ergraff. Hien huet laang a breet erklärt, wourop et Autorechter ginn: Op alles, wat kreativ produzéiert gëtt an net reng funktionell ass, sief et en Text, e Bild, eng Melodie oder souguer e Geroch. Dat kann e Logo sinn, en Text an engem Firmebléiden oder d'Kommuniounsphoto, déi d'Hobbyfotografin fir hier Nopesch gemaach huet. Leschten Enn alles, dat e Fonke Kreativitéit opweist. A wien huet d'Rechter op all dës Saachen? Automatesch d'Auteuren, dat heescht de Graphiker, deen d'Iddi fir de Logo hat, d'Sekretärin, déi den Text geschriwwen huet an d'Nopesch mam Fotoapparat.

Géint e bescheiden Schutzgeld vu 25 Euro suert Luxorr dofir, datt kee Rechter klaut, déi en net huet.

Als nächst koum e wichtige Punkt: wéi huele mer den Auteuren dann elo hier Rechter ewech? Den Här Putz huet bedauert, datt a bal kengem Aarbechtsvertrag steet, datt en Employé seng Rechter un alle méigleche Wierker, déi en an der Firma schaaft, direkt u säi Chef oftrëtt. En huet



d'Leit am Sall dozou opgeruff, sech duerch Klauselen d'Autorerechter ze sécheren. Net datt op eng Kéier nach en Aarbechter kéim, dee seng kreativ Aarbecht fir sech wéilt. Vu datt den Här Putz ganz laang dorop insistéiert huet, huelen ech un, datt am Sall virun allem Patronen souzen, déi en Interêt un dës Saachen hunn.

Dono ass erklärt ginn, wéi een déi Rechter, déi ee sech ënnert den Nol gerappt huet, a Geld verwandele kann. Bis elo hat ech a menger Naivitéit geduecht, meng Nopesch wier mat engem Pak Knippercher zefriden, an d'Kommuniounsphotoë géngen dono mir gehéieren. Net, wann den Här Putz Geleeënheet kritt, meng Nopesch opzklären: Souguer wann ech bezuelt hunn, behält si hier Rechter, an ech dierf meng Fotoen nëmmen am engste Frëndeskreies weisen. Wann ech se op meng Homepage héichlueden oder fir aner Leit Kopieën maache wëll, muss ech meng Nopesch froen, ob si domat averstan ass. An natierlech dofir blechen. An net nëmmen eng Këscht Knippercher. Dat gëtt richteg deier. Luxorr huet do eng Tabell opgestallt: Déi bëllegst Kopie kascht 3,05 Cent! Hm, a wéi bezuelt een den zwanzegsten Cent? Gëtt dat ofgeronnt?

Kee Problem, berouegt eis de Romain Jeblick, senges Zeechens Secrétaire vu Luxorr. Mir mussen eis

guer net do drëm këmmen. Luxorr iwwerhëllt jo d'Gestioun vun eise Rechter! Géint e bescheiden Schutzgeld vu 25 Euro suert Luxorr dofir, datt kee Rechter klaut, déi en net huet: d'Nopesch mam Fotoapparat dierf genau sou bezuelen wéi déi grouss Firma, déi sech hier Rechter jo viru schwéier bei hieren Aarbechter erkämpft huet. Mir all si Produzenten vu kreativen Wierker an iergendengem Sënn, also gi mer am beschten alleguer Member bei Luxorr!

Da si mer all geschützt. Kee kann eis Rechter méi klauen. Wien eng Kopie maache wëllt, a wier et nëmme firmerintern, muss blechen. U wien? Ma u Luxorr. Mee eppes verstinn ech net: Muss dann elo all Kopie, déi an all Firma zu Lëtzebuerg gemaach gëtt, opgeschriwwen ginn, fir datt ee weess, wien wéivill Geld zousteet? Ma nee, erklärt den Här Jeblick, nach ier ech déi Fro stelle kann: all Firma kann (oder besser gesot, muss, wa se legal wëllt sinn) e Package kafen a pauschal blechen. Da kritt een eng Lizenz, déi beweist, datt ee keng Kopie-Piraterie bedreift.

A wouhier weess Luxorr, u wie si dat villt Geld muss weiderginn? Well Luxorr behält dat jo net fir sech, si si jo eng „association à but non lucratif“ a maachen dat also ganz oneegennëtzeg am Interêt vun de Kënschtler. Wéivill Auteuren vertrëtt Luxorr eigentlech? Op de Slides stung eppes vun zéngtausende vun Auteuren, dat ass impressionant...

Leider kommen ech net derzou, dës Froen ze stellen, well elo ass den Informatiounsowend eriwuer. Zwee, dräi Leit dierfen eppes froen, mee déi aner, déi brav de Fanger ausstrecken, kommen net méi un den Tour, well „keng Zäit méi ass“. Sorry, dat dauert soss ze laang. Aha.

Ech trëppelen also brav no vir, well ech denke mer, datt déi nett Häre vun Luxorr dach ganz bestëmmt uspriechbar sinn. Ech froen den Här Putz, wéivill Leit da bei hinne Member sinn. Nodeems ech dës Fro persistent véier Mol stellen, kréien ech endlech als Äntwert „ëm déi 80“, inklusiv Firmen a Press. Dat ass awer wäit vun 10.000 ewech, oder net? Anscheinend sinn dat 10.000 potenziell Auteuren. Aha, ech verstinn.

Als nächst géng ech gäer wëssen, ob si dann nëmme Geld asammele vu Kopien, déi hier Membere betreffen. Ah nee, dat gëtt pauschal gemaach,

dat anert ass jo net machbar. Eben. A wie kritt dat Geld? Selbstverständlech d'Auteuren, wa se Member sinn. An déi, déi net Member sinn, déi auslännesch Auteuren zum Beispill, déi an eisem klengen Ländchen d'Majoritéit vun de kopéierte Bicher ausmaachen? Wie kritt dat Geld vun hiere Kopien? Den Här Putz fänkt un, ongedëlleg ze ginn. Vlächet stellen ech och einfach nëmmen zevill domm Froen. Mee et interesséiert mech, ech wëll dat elo verstoen. Den Här Putz kritt nëmmen nach „Dat ass Gesetz!“ eraus. Wat e komescht Gesetz, dat enger Asbl sou e Geldandriwen erlaabt. Wie kritt dat Geld, Här Putz? Ass iwwerhaupt scho Geld erakomm? Jo, et si scho Lizenze verkaaft ginn. Et wëllt jo keen eppes illegales maachen. An ass dann och scho Geld ausbezuelte ginn? Den Här Putz erklärt, datt dat bis zu zéng Joer dauere kann. Aha.

Wie mécht dann elo Geld mat där Saach do? Eis engagéiert, fräiberufflech Schrëftsteller? Meng Nopesch mam Fotoapparat? Oder vlächet e ganz aneren?

D'Auteure mussen also Memberskaarte bezuelen, fir hier Rechter geltend ze maachen. Bis elo war dat dach gratis! Wien net der Luxorr bäitritt, deem seng Rechter gi wuel fleten, well d'Firmen jo scho pauschal u Luxorr bezuelen, a sécher net nach eng Kéier dem Auteur eppes bezuele wëllen. An iergendwann, an zéng Joer oder sou, kritt dann een Auteur säi Geld. Mee Luxorr weess jo guer net, vu welchem Auteur wéivill Kopie gemaach gi sinn! Kritt eng Firma, vun där hierer Broschür genau eng Sait kopéiert gëtt, genee sou vill Goss wéi de bekannte Schrëftsteller, dem säi Buch all gudden Dag konsultéiert gëtt? Dat wier jo awer ongerecht, oder net? Dat géng jo eise Schrëftsteller guer net hëllefen, mee héchstens de grouss Firmen, déi dann souwuel als Producteur wéi och als Utilisateur u Luxorr bezuelen! An déi ginn hier Käschen natierlech un d'Clienten, also un eis all, inklusiv d'Lëtzebuerger Schrëftsteller, weider. Oder net, Här Putz? Mee dorops huet den Här Putz keng Äntwert.

Wie mécht dann elo Geld mat där Saach do? Eis engagéiert, fräiberufflech Schrëftsteller? Meng Nopesch mam Fotoapparat? Oder vlächet e ganz aneren? Ech hu mer déi Fro selwer beäntwert, deen Owend, am Tempel vu Luxorr.